

27.september

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaannut nr. xx, xx. xx 2016-imeersumut siunnersuut.

(Nammineerluni nalunaarsuinissamut piffissarititaasumik, kiisalu nunani allani akileraartarnermi oqartussaasunut paasissutissanik tunniussisarnerit pillugit ilisimatitsisussaataaneq, taamatullu aningaaserivimmi kontumik tunniussisussaataaneq aammalu soraarnerussutisianut tunngasunik paasissutissanik nalunaarsuineq pillugit allannguineq)

(Aningaasaqarnermut Aatsitassanullu Naalakkersuisoq)

Siumumiit aalajangersakkat nunanullu allanut isumaqatigiissutaasartut malillugit ineriartortuarnissaq pingaartitaraarput soorluttaaq sapinngisamik nunatsinnut iluaqutaasumik aningaasarsiornikkut nakkutilliinerit aqutaasumik ingerlanneqarnissaannut suleqataassasugut.

Akileraartartut pillugit upernaq inatsisartut aalajangersaanerisa kingunerisaanni pisariaqalerpoq Danmarkimiittut, Savalimmiuniittut nunanillu allaniit akileraaruseriffik soraarnerussutisiaqarnissamut aqqissuussinernut akiliutinut nalunaarsuissasoq, tamatuma imarissavai sulisitsisut aamma inuit nammineerlutik akiliutaat nalunaarsuiffeqassasut.

Siunertarineqarpoq kontut pillugit paasissutissanik nalunaarutiginnittarnermik paarlaaqatigiittarnermillu OECD-p nunarsuarmi tamarmi atuutilersitaata kingunerisaanik nunarput sinnerlugu atsioqatigiittoqareerneratigut tamatumunnga malititsinissaq.

2016 naanerani Qallunaat nunaanni aningaaseriviit checki pillugit isumaqatigiissut atorunnaassaaq, taamatuttaaq checkinik atuineq nunatsinnittaaq atorneqarnera annikillilluinnarnikuusoq Siumumiit arajutsisimangilarput. Taamaasilluni ukiut tamaasa akileraarutininik aningaasatigut utertitsisarneq sunnerneqartussaammat tamatuma malitsigisaanni akileraartarnermut ingerlatsivimmut bankkontomik nalunaarsuisalernissamik innuttaasut peqquneqarnissaanik siunnersuut imaqarpoq.

Inuussutissarsiutinik ingerlataqartunut nammineerluni nalunaarsuiffimmik akileraaruseriffinnut nassiussisarneq nutaanik piffissalernerneqarnissaanik siunertaqarpoq, tamanna inuussutissarsiortunut nammineerluni nalunaarsuiffiit elektronikkimik atortorissaarutit atorlugit nalunaarutigineqassasut siunertarineqarpoq.

Tusarniaanerni akissutigineqartuni aarleqqutigineqartut Naalakkersuisuniit tusaaniarneqartut allaaserisami atuarneqarsinnaaput ass. inuussutissarsiortut annerusumik suliakkerneqarlutillu aningaasartuuteqarlernissaat aarleqqutigineqarpoq, tamanna naalakkersuisut naatsorsuutigaat atortorussaartit ataasiartumik aningaasartuuteqarfiussasut kingorna inuussutissarsiortunut iluaqutaasumik allaffissornikkut suliassanik annikillisaataasasoq naatsorsuutigineqarluni.

Siumumiit inuussutissarsiornikkut siuarsaanernut suliffissaqartitsinernullu pingaartitsinerput ersarissassavarput, taamatuttaaq nunatsinni uummassusillit uummaatsullu aningaasarsiornikkut pilersitsiviusut tamarluinnarmik annerpaamik nunatsinnut kivitseqataasasut aningaasarsiornikkut naapertuuttunik ingerlatsisoqarnissaa ujartortuarparput ilisimaaralugu avataanniit aningaasalersuisut nunatsinni kivitseqataanissaat anguniaripput. Taamaammat allaffissornikkut eqaatsumik sullissineq anguniartuartariaqarmat siunnersuut taamatut isikkoqartillugu ilalerparput.

Taamatut oqaaseqarluta aalajangiiffissatut siunnersuut ilalerlugu matumuuna ataatsimiititaliamut susassaqartumut sukumiissumik misissorluarneqarnissaanut suliniuteqarfigisassanngorlugu ingerlatinneqassasoq Siumumiit inassutigissavarput.

Suka K.Frederiksen

Siumut